

ЛУИМА СЭРИПОС



www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

8 ноября
2013 года
№21
(1063)

Олимпийский нāй мāн мāvн тотвес



А. Вьюткин / вāрумхури

Ты
номерыт
ЛОВИНЫТЭН:

Тōва сākконыт
йильпи щирыл
хасвёсыт

3

Пусмалтан
вāрмалъ
урыл

5

Мāньци хум
чемпионыг ёмтыс

6-7

Ќс акв нēпак
тāратавес

15

Пуссын мирыт
юртыңың вос
өлэгыт

16

Округ миркол кўщаит сапранияныл

Мошёрт ты тал ты ойгпи. Таимāгыс йильпи тал кастыл манах олн ань таставе, ты урыл потыртан мāгыс округ правительстват рўпитан кўщаит акван-атыглавёсыт.

Ман округув налог-олн хосыт олы. Манах олн атаве, тасавит олн лāкква та уртаве. Кāсың талныл мā-вōй мощцами, ань газ ёт рўпитан организацият округ пāлыл нётуңкв патавет. Тāн туп 50% савит налог ойтуңкв патёгыт. Газыл яласан мāшинат ос мощца налог-олныл тах пинавет. Ты рўпата таимāгыс вāраве, мā-витув сака ат пāнктаве

ос округув янытыл олнэ пāвлыт ос ўсыт мус газ тотнэ турпат моляхнув вос пинавет.

Тāрвитың āгмыт урыл кўщаит ос потыртасыт. Ты тал Ханты-Мансийск ўст ос Ханты-Мансийский районт олнэ сав хōтпа туляремия-āгмылёмтсыт. Элмхōлас ты āгмыл мāпорсўитн, лёмвоитн хāхтаве. Ань ты āгм элалъ ул вос тāрамлы,

миркол кўщаит нила миллион солкōви ўс мāгыс ос 2 миллион солкōви район мāгыс тастысыт.

Ань ты олныт хосыт лāпкат, тēнут ошнэ колыт мāпорсўит алнэ мāгыс тэрпил акваг паргалтавет. Ыс лāпат олнэ вит вōнхат, лēх пōхыт люльнэ вōр ос тэрпил сōсантавес. Ань ты рўпата акваг вāруңкв патаве. Хōпсы āгмыл ос сав хōтпа āгмыңыт. Тāнаныл пусмалтан мāгыс ань иң сав олн округ бюджетныл тах миве.

Колўрнэ мāхум мāгыс ос тамле нēпак пир-майтавес. Ань жилищный программа арыг 560 миллион солкōвил хасвес. Ты олнытыл йильпи колыт ўнттуңкв патавет, руш щирыл лāвавет – арендный дом. Ос тот туп мāнылат щёмьят, мāныщи ман ханты щёмьят ос бюджетникил колылтах мивет. Та кол тыналаңкв ат рōви, туп аренда щирыл тот мāхум олуңкв тах патёгыт.

**Валентина
ХОЗУМОВА**

Ты āгм 87 хōтпа палт хōнтвес

Та ётпост 7 хōталныл 10 хōталэ мус «Диабет. Время действовать» нампa акция вāрыглавес. Нижневартоск, Ханты-Мансийск, Сургут ўсыт ос Сургутский район янытыл «мобильный диабет-центрыг» лāвнэ мāшина яласас.

Кāсың кāсашан хōтпа тув ялыс, тав «сахарный диабет» āгм оныщи ман āти, уральтавес. Лёккарыт хōтпа кēлп анализе хосыт ты āгм молях хōнтуңкве вёрмёгыт.

Хўрум хōтал сыс акв сōтыра 500 арыгкем элмхōлас лёккарытын уральтавёсыт. Ань 87 хōтпа палт ты āгм хōнтвес. Ты мāхум тамле тāрвитың āгм оныщёгыт, тāн аты вāмыт. Лёккарыт лāвёгыт, āгм «сахарный диабетыг» таимāгсыл лāваве, мāхум олэгыт, номсёгыт, āгм ат оныщёгыт. Ты āгм щар ат суйты. Ос элалъ лёккарытн воссыг пусмалтаңкв ат вёрмаве.

āгмың хōтпа олнэты сыс туп инсулин-тэрпи укол таквинатēн тўщ-

тым элалъ олы. Тамле тāрвитың нак ул вос ёмтыс, мāхум пуссын вāтихал уральтахтуңкве лāвавет. Лёккарытн кēлп виве, ос тот саккар сāvнув ке хōнтаве, āгм тāра пусмалтаңкве овылтаве.

Ань ты диамобиль-мāшина туп яныг ўсыт ос Сургутский район хосыт яласас. Тэлы лёнхыт хунь вāравет, лёккарыт мāнь пāвлытын минёгыт, тот олнэ мāхум ос тах уральтыяныл.

Мāн округувт 45 сōтыра арыгкем хōтпа сахарный диабет āгм оныщёгыт, ос мана-савит хōтпа ат уральтахтасыт ос ты āгм оныщёгыт, нэмхотьют ань ат вāг.

**Людмила
ТЕТКИНА**

Сав ул вос тулмантэгыт

Мош мōлалнув Ханты-Мансийск ўст прокуратурат рўпитан тит кўщай хумыг Алек-сандр Кондратьев ос Ринат Кунсбаев ёт пресс-конференция вāрыглавес.

Хумыг та урыл потыртасыг, хумус лāпалахтыглым яныг кўщаиг рўпитан мāхмытныл олн вōвёгыт.

«Ты тал сыс округув янытыл нелсāt вāt сāvсыр тамле вāрмаль щирыл прокуратурат рўпитан мāхум тэла пўнсыгласыт. Тувыл нелсāt лāпатем кўщаит олн вōвнэныл мāгсыл пуввёсыт. Щар сав тамле люль вāрмаль Сургут ос Нижневартоск ўсыгт рўпитан мāt хōнтвес. Сāвыңпālэ тыи сав мырың ос сав олн винэ мāt ёмталы.

Мāн округувт пўльницатыт ос няврамыт хаништан колытыт нēпакыт пентым ос олн тāнтинāнылн пиным щар сав люль вāрыглавес. Сав мā-

хум мāнавн тāнти потыртэгыт. Хумус тāнанылныл хотты кўщай матыр вōви, тāн мāнавн та урыл лāтың тётэгыт. Мāн аквты тāра та кўщай уральтылў.

Кўщаиг олнэ мāхум мāн тāнаныл вāтихал уральтым оныщиянў. Тāн ты урыл кос вāгыт, тāнти элалъ аквта щиранылт люль вāрёгыт.

Мош мōлалнув кўщаиг олнэ акв лёккар вāнэюртхōтпатэаквтуп рўпитаңкв ат вёрмынэты мāгсыл нēпакыл вāрысты. Тāнэпакширыл тав пенсиян минас. Ос тāланэ ат кос тōвлысыт. Тэн ос пуввёсыг.

**Александр
ВЬЮТКИН**

ЛЯХХАЛЫТ

Това сакконыт йильпи щирыл хасвёсыт

Округ Думат рўпитан депутаты
сапранин акван-атхатыглама-
ныл порат хусахтем савсыр саккон
пирмайтасыт. Ты халт тән өлнэ ко-
лыт урыл потыртасыт.

«О регулировании отдельных жилищных отношений» наппа саккон щирыл округувт колыт ўнттуңкве тах патавет. Борис Хохряков, округ Дума кушай хум, лавыс, ты саккон округ Думат Молодёжный палатат рўпитан маньлат хөтпат хансуңкве номылматсыт.

Ты нэпак щирыл тамле колт өлнэ щёмьят мощща олн ойтуңкв патэгыт. Тамле колыт Нефтеюганск, Ханты-Мансийск ос Сургут ўсыт тах ўнттавет. Тамле колыт ўнттым округув олн тах сэлы.

Мөт саккон «Обеспечение доступным и комфортным жильём жителей Югры 2014-2020 годы» хосыт махум йильпи щирыл кол ёвтуңкве тах патэгыт. Ань рўпитан программа хосыт сосаң, маньлат щёмьят, бюджетыт рўпитан махум субсидия-олныл кол ёвтнэ магыс мивет. Йильпи 2014

тәлныл кол ёвтуңкве кәсащан хөтпат тәнки олн атуңкве патэгыт ос ипотечный агентстван олнаныл тах пиньяныл. Тувыл 2018 тәл юи-пәлт тән ты олныл кол ёвтуңкв тах нётавет. Кўщаит лавсыт, округувт ты программа хосыт 5 сөтыра арыгкем элумхөлас кол тах ёвтэгыт.

Ос акв саккон щирыл яныг машинал манос автобусыл яласан хөтпат «транспортный налогыт» лавнэ олн ань туп 50% савит ойтуңкв патэгыт. «Природный газыл» яласан машина өщнэ хөтпат - туп тән мощщанув налог-олн тах ойтэгыт.

Ты коньпал сапрәнит махум сав тәл рўпитан хөтпат Почётный грамотал мисаныл. Тувыл судья-хөтпат пёриясыт. Ос сав мөт эрнэ сакконыт тот пирмайтасыт.

**Людмила
ТАСМАНОВА**

Нэ-хөтпат уйигтым ёнгысыт

Мань таквс этпост округувт акв пұмаш ёнгынвәрмалывәрыглавес. Нэт витыт уйигтым мечикылёнгысыт. Рушщирыл ты ёнгил «Водное поло» лававе. Россия янытыл Нижний Новгород, Кириши, Москва ўсытныл нэ хөтпат тыг ёхталасыт.

Мән округувныл агиквет ос ёнгысыт. Ханты-Мансийск ўст Югорский университет колнакөт ты ёнгын вәрмалы магыс бассейн

щөпитым өлы. Нэ хөтпат хұрум хөтал тот кассыт.

Ты ёнгын тэла округт өлнэ ныврамытн сака мұсты. Агитпыгыт тамле касылын хаништахтуңкве сака кәсащөгыт. Ты ёнгын вәрмалы элалы акваг тыт вәрыглаңкве тах патаве. Нән хуньт ты ёныг урыл хўнтамләгын ке, пұмаш магыс тув ос ялән, мощ сунсән.

**Николай
МЕРОВ**

Олныт ловиньтавёсыт ос элалы ләкква-уртвёсыт

Югра правительстват рўпитан кўщаит
2014 тәлн ос тыгыл элалы 2015-2016
тәлыг кастыл бюджет олныт ёмшакв ловинь-
тасаныл ос савсыр программат щирыл мақыг
ләкква-уртсаныл. Ты өвыттыт губернатор
вәңын нэ Вера Аркадьевна Дюдина журналис-
тытн потыртас.

Округувт тәл сыс мансавит тонна мавөй нөх-виве ос ма янытыл акв баррель магыс мансавит тын пинаве, кўщаит тув рөвлахтым олныт элалы ловиньтыяныл. Мөтыт тәлт 253,5 млн. тонна мавөй тах нөх-виве. Ос баррель магыс тән 101 доллар савит тын пинсыт.

2015 тәлт - 249,7 млн. тонна, 2016 тәлт - 247 млн. тонна мавөй виңкве таңхөгыт ос 100 доллар савит тыныл тыналаңкве хассаныл. Тувыл та щирыл пуссын сәлнэ олныт РФ янытыл савсыр мән ләкквауртавет.

Ань 2014 тәлн округ бюджет магыс 166,4 млрд. солкөви тәстувес. Тән 25 савсыр программа щирыл тах холтавет.

2015 тәлн - 172,3 млрд. солкөви, ос 2016 тәлн 178,9 млрд. солкөви ловиньтасыт. Ты коньпал «резервный фонд Югры» лавнэ олн атнэ мән 13 млрд. солкөви сөпасыг пинсыт.

Касың тәл кол ўнттын программан савнув олн тәставе, пёс колыт хоткуритаңкве ос ЖКХат савсыр вәрмалит ёмшакв щөпитан магыс ос янас олн тәстэгыт. 2014 тәл «Культура тәлыг» лаввес. Таимәгыс тув хансым программатытн 538 млн. солкөви миве. Тыгыл 400 млн. солкөви культурный центрыт, клубыт манос театрыт ўнттын магыс холтавет тах. Мөт программат олн тәл ос ат хультэгыт.

**Тамара
МЕРОВА**



Интернет-видеохурриов.

Кол ёвтнэ магыс хоса ўрхатуңкв эри

Ман округувт олнэ кол манос субсидия-олн магыс 53 сōтыра щёмья очередин хансым олэгыт. Тув маньлат щёмьят, маньщи ос ханты хōтпат ос бюджетный матт рупитан щёмьят ловиньтавёсыт.

Ань кўщаянув ийльпи программа хассыт - 2014-2020 талыт сь округувт олнэ махум колыл хумус миңкв патавет. Ты урыл губернатор ваңын хум Д. Шаповал, Ипотечный агентстват кўщай хум Е. Чепель ос кол ўнттын департаментыт кўщай А. Кривуляк потыртасыт.

Округ мирколт рупитан хум Дмитрий Шаповал лавыс, ань ты программа таимагыс

щёпитавес, юи-овыл талыт сь сав махум субсидия-олныл, социальный квартирал майвёсыт. Кол ўнттын вәрмалын округ бюджетный сака сав олн мины. Округувн ушты ёхтум махум, сав тал тыт олнэ манос тыт яныгмам махум пуссын акв щирыл очередин хансавет ос кол ёвтнэ магыс субсидия-олныл мивет.

Ань кўщаянув ты вәр-

маль тара-паттысыт, ос таимагыс тан ты программа мōт щирыл хассаныл. Ань субсидия-олныл манос квартирал та хōтпат мивет, хотьют 15 арыгтем тал аква тыт олэгыт манос тыт яныгмасыт, руц латңыл ты вәрмалы «ценз оседлости» тох лаввес.

2014-2020 талытн колыт магыс туп 26 миллиард солкōви миве. Мōтыт 2014 талн - 8,9 млрд. солкōви. Олн кос миве, ос кўщаянув ань лавсыт, субсидия-олн ўрнэ махум хосанув ўрхатуңкв патэгыт. Ты элы-пал талытт махум титах-хўрмах тал оче-

редит ўрхатсыт, ань лов тал мус ўрхатуңкв патэгыт.

Тувыл иң тамле ийльпи вәрмалы ань вәрвес, руц латңыл «накопительный ипотекаг» лававе. Ань кол ёвтуңкв касащан хōтпат танти олн атуңкв вос овылтахтэгыт. Округувт «Ипотечный агентства» рупиты, тув хурум тал касың этпос 6 сōтыра 250 солкōви хōтпа пинуңкв те паты, тав кол ёвтнэторат округ бюджетный ос 450 сōтырал тах нётаве.

**Валентина
ХОЗУМОВА**

Нэпак таратан урыл потыр



Ты тал Россия Конституция рупитанэторат пасныл хус талэ товлы. Ты кастыл Ханты-Мансийск ўст нэпак таратан вәрмалы урыл яныг сапрани вәрыглавес. Россия янытыл савсыр маньл яныг кўщайтыг ёхталасыт. Руц щирыл ты вәрмалы «Избирательная политика и избирательная система России» намаим олыс.

Ань юи-овыл талытт ты вәрмалы урыл махум ватихал потыртэгыт. Ты ати, нэпак таратан порат ошмарлан нак иң ёмталы. Ос Россия янытыл Уральский Федеральный округ пёрияпыт мак ёмасыт минэгыт.

Тыг ёхталам кўщай хōтпат лавсыт: «Нэпак таратан порат савнув мир вос ёхталы. Нан хоты хōтпа пёриегын, тох та элалы олункве патэгын. Ань матъёмас юи-овыл талытт пёрияп мўсхал щирыл мины, нэпак таратан махум ты вәрмалы танки ос уральтым оныщияныл. Ошмарлан вәрмалы молях тара-паттаве. Нэмхотыют ул хўнтлэн, хотты кўщай нупыл номтын паты, ёхтэн, тав магсылэ нэпак таратэн».

**Николай
МЕРОВ**



Мань таквс этпос 30 хōталэ – 1937-39 талытт наскәссыг порслым махум кастын хōтал

Ханты-Мансийск ўсты махум магыс памятник тўштым олы. Касың тал та хōталт тот сав мир акван-атхатыглаы. Кўщайт, яныгпала хōтпат та пылыщман пора номылматыглаляныл. Ань мир нупыл такви рўтанэ урыл акв матум руц эква потыртас, тав наме Надежда Ивановна

Кумирова. Тав щәняге-ащаге маньлатыг олсыг, хунь тан щёмьяныл тыг тетвес. Ань эква та тарвитың пора урыл лўньшим потыртас. Тав лавыс, ты наскәссыг порслым махум нама-ныл нэмхуньт ул вос ёрувлавет.

**Валентина
БАСИЛЬЕВА**

Мәнки савсыр тәнүт вәрөв

Мо́лалнүв округ губернаторув
ваңын хум Сергей Полукеев
ляххал тотнэ ма́хум ёт хонтхатыглас.
Тав агропромышленный комплекс
уральтан күщаиг рүпиты. Ань ты
вәрмалъ элалъ хумлег олы, тав ты
урыл потыртас.

Округ агропромышленный комплекс элалъ тотнэ ма́гыс ань ма́хум субсидиял майлавет. Касың талныл ты вәрмалъ 6-7 процентын нөх-савми. Югра мат мис ошнэ хотпат тал сыс хусахкем сөтыра савит литра шаквит, онтоловхуйпловкем сөтыра кила нёвыль тыналан ма́гыс тастэгыт.

Ты коныпал мо́лалнүв Сургутский район Белый Яр павылт щич-

курёкыт янмалтан яныг пёрма пүсвес, тувыл сав мўни тыналав. Ань мус мән предприятиянув 41 процент савит савсыр хўл, 9,5 процент нёвыль, 3,5 процент шаквит, 51 процент картёпка Югра мат о́лнэ мир ма́гыс тыналэгыт.

Тыгыл элалъ ос ма́вит ўргалан урыл потыр олыс. Округувт ма́шунь нөх-вуим ма́витув сака ат паңктаве

кос, ос 1986-2006 талыт сыс ма́-воил сөсантым ма́ ань 2020 тал мус хот-сыстамтаңке тах эри. Ань ос хоты мат ма́-во́й ма́н посы ке, та ма́ тара хот-сыстамтаве, тох ат оссувлаве.

Тувыл күщай хум ос мохсаң хўл урыл потыртас. Ань касың талныл ты хўл мощщами. Тыт хўл янмалтан завод рүпиты кос, ос хунь э́рнэ савит хўл ёмты, ўрхатуңке эри. Мо́лал Ямал ма́ губернатор Дмитрий Кобылкин лавыс, Югра мат мохсаң хўл пувуңке акв талн ёл-поилтталаве ке, Ямал ты ма́гыс компенсация-олн ойты тах. Сергей Полукеев

ев ты урыл тох лавыс: «Тыи ёмас вәрмалъ олнүв. Мәнъ мохсаң хўлыт хўрум таланыл товлын мус Ямалт Ас ят ўйигтэгыт. Ётыл уш тән Ханты-Мансийский округн ма́н Ас явн таратахтэгыт. Ос ань ты хўлыт пувуңке шар хот ат поилттаве. Мо́тыт талныл ма́н учёный хотпат ёт ты вәрмалъ ёмшакв ханищтылүв. Тувыл уш хўланув савмалтан ма́гыс э́рнэ тэла вәрөв. Мән ты вармалъ туп акван-нётхатым мусхал щирыл щёпитаңке вөрмилүв».

**Николай
МЕРОВ**

Пусмалтан вәрмалъ

Ханты-Мансийск ўст округ здравоохранение Департамент колт ляххал тотнэ ма́хум акван-атыглавёсыт. Ань округув янытыл пусмалтан вәрмалъ палт ма́к яныг күщаиг Александр Вячеславович Филимонов олы. Ты хум китыглавес, ма́н ма́вт пусмалтан вәрмалъ манхурипаг олы, ма́хум пусмалтан ма́гыс олн то́вылхаты ман а́ти. Нән ань элалъ тав потре ловиньтэлы́н:

– Ма́н, округт о́лнэ ма́хум, э́лы хоталув урыл номсуңке вөрмөв. Ты ма́гыс олн оныщөв. Пу́льницау́н савсыр тының оборудованият вәтихалёвтыглөв, йильпи пу́льница́т ўнттөв, округувн номтың лёккарыт вөвөв, рүпата олныл мусхал щирыл ойтуңке вөрмиянүв. Россияв янытыл воссыг нәмхотты область ман округ тох ат олы, тысавит олн ат оныщи.

Округувт ма́хум яныгш давление а́гмыл савалэгыт, келпаныл келптарс хосыт мусхал щирыл овуңке ат вөрми. Уш самын па-

тум сав няврам а́тимыг ёмты. Хопсы ос бронхиальная астма а́гмыл ос сака сав хотпа савалы. Савнаркоманыт о́лэгыт, вина айнэ ос хохса хартнэ хотпа ос сав.

Описторхоз ос туляремия а́гмыл сака сав хотпанув а́гмыңыт. Ма́н тыт ань хўлың мат о́лэв, таима́гыс описторхоз а́гмыл ма́хманув ёмтэгыт. Ты сака пилышмаң а́гм, ма́йт ўйитын шалтаве, тувыл рак на́мпа а́гмыл э́лумхолас та ёмты. Тамле а́гм пусмалтаңке та́рвитың, хотпа хоса пыл ат савалы, а́тимыг та ёмты. Ты а́гм пус-

малтаңке эри, ма́йт ўйит алуңке э́рэгыт. Ты а́гм щирыл Россияв янытыл ма́н о́выл местат хансым о́лэв. Ам номсытөмт, ма́ янытыл ма́н ос о́выл местан хаснувөв.

Сав ма́хум ма́шинал яласан порат лёңхыт холэгыт. Ты ос сака пилышмаң вәрмалъ. Тамле мат сав няврам порсы, то́ват ос лылың та́гыл хультэгыт те, а́ г м ы н - м о с ы н ы г ёмтэгыт.

Мир пусмалтан ма́гыс, ма́н округт о́лнэ лёккарыт ёт яныг рүпата вәрөв. Мәнъ павлытыт о́лнэ пу́льница́т ань пуссын лап-пантыянүв, ма́хум туп хотыл тот пусмалтавет. Ос матыр та́рвитың а́гм та́рапаттаве те, хотпа яныг лёккарың ма́н тотаве, тот мусхал щирыл уральтаве, пусмалтаве.

Тамле пу́льница́тын номтың лёккарыт вө-

вуңке э́рэгыт. Лёккар хотпа ма́нь павылың ёхтуңке кәсащи те, тав акв миллион солкөвил о́йтаве, о́лнэ колыл миве. Мәнъ хотпа ман яныг хотпа ты э́лы-палт хот рүпитас ман а́ти – ты нупыл сунсуңке ат патөв. Ма́к таи, ань хотпа рүпитаңке вос тахнув ос рүпататэ ёмашакв вос ва́гтэ. Округув янытыл касың пёс пу́льница́т пёнтсыл, йильпи пу́льница́т ўнттөв, иң на́лыман нупыл ат пу́льница́т ўнттын щирыл олы.

Округт о́лнэ я́тил тының ма́хум, матыр а́гмын сумыллы те, лёккар палт та́раминэ́н, уральтахтэ́н. То́ванакт пилышмаң а́гм уш суйтнөтэ порат та́рапаттаве те, пусмалтаве, хотпа э́лалъ ос сав тал олы. Пуссын пуста́гыл о́лэ́н!

**Светлана
РОМБАНДЕЕВА**

Няврамыт мағыс олн ат сәлитәгыт

**Туи сыс мансәвит няврам, хоты мāt
ўшлахтасыт, хōт пусмалтавёсыт,
мансәвит олн тув ойтвес, пуссын ты ōвылтыт
лѣххал тотнэ махум элы-пāлт хұрум кұчай
хōтпа потыртасыт.**

Елена Немчинова, нётмил вāрнэ департаментыт кұчай вāңын нэ, лāвыс: «2013 тāлт няврамыт ўшлахтын мағыс округ бюджетныл 800 млн. солкōви тāстувес. Тāрвит вāрмалын ярмум щёмьят нявраманыл ўшлахтын манос пусмалтан мағыс российский бюджет пāлыл 40 млн. солкōви тāстувес ос мōт олныт савыңпāлэ савсыр муниципальный образованияныл майвёсыт. Ань пуссын ты олныт хосыт 60 сотыра āгит-пыгыт савсыр мāt ўшлахтасыт».

Юграв янытыл туи сыс 486 няврам мағыс ўшлахтын ос пусмалтахтын колыт рұпитасыт. Тōва лагерит школатт щёпитым олсыт. Тот няврамыт тыт-тувёсыт, студентыт тāн ётаныл ёнгысыт, матарыл пұмшалавёсыт, ос хұрум щёс юи-пāлт юв та тāртыглавёсыт. Ты коньпал округ янытыл 22 палаткаң лагерит вāрыглавёсыт. Мōтынтыт тот няврамыт ёмшакв тыттын мағыс субсидия щирыл савнув олныл тāставет.

Тувыл Хāльўс, Хōнтаң, Белоярский, Ханты-Мансийский районытыт ос Урай ўст соссāн няврамыт мағыс этноцентрыт рұпитасыт. Тув ханты, мāньщи āгит-пыгыт коньпал мōт мир няврамыт ōс ўшлахтуңкве ялантāгыт. Тāнанылн тот сака мұсты. Тамле этно-

центрыт ос этнолагерит вāрнэ мағыс соссāн хōтпанув округ пāлыл грант-олныл элаль вос нётавет.

Антон Тимкин, образование департаментыт кұчай вāңын хум, ōс потыртас. Тāн няврамыт ўшлахтын ос пусмалтан тēлат тāл палыт уральтāгыт. Каникулыт порат тōва няврамыт лагерын ялуңкве вёрмёгыт.

Тāн савсыр ёмас тēлат вāруңкве студентын акваг нётавет. Ты тāл туи сыс 682 студент няврамыт ёт лагерын ялнэ коньпал 452 кол пōхат ос 283 школьный клубыт рұпитасыт.

Игорь Крутько, спорт тēлат палт кұчай вāңын хум, лāвыс: «Округ янытыл 239 спортивный площадкат рұпитасыт. Туи сыс 75 сотыра арыгкем няврам тув ялантасыт. Лāтың ат хұнтлын подросткат ты площадкатын ōс вōвиньтāлсанмў. Тāн мāньлат спортсменыт ёт мёчикыл ёмшакв ёнгүңкве, поргүңкве ос пувлүңкве ханищтавёсыт».

Тувыл туи ўшлахтын колыт рұпитанэныл сыс нэмхотты няврам ёт лўль вāрмаль тот ат ёмталас. Пуссын пустағыл юв ёхтысыт, хōт-āti ёмшакв ўшлахтасыт, пусмалтахтасыт. Тāн ётаныл рұпитан хōтпат вāгтал сака ат патсыт.

Тамара
МЕРОВА

Такви ёре вāнэ хум

**Мāнь таквс этпос онтоловхуйплов
хōталт Америкат Колорадо нампа мāt
Денвер ўст мāньщи боксёрув Руслан Проводников Майк Альварадо ёт алхатым касыс.
Боксёрув янытлан щирыл округувныл мāн
нёлолов хōтпа тув ялсўв. Мāн ётув Руслан
оматэ Раиса Алексеевна ōлыс, тав пыге каснэ
мāн щар ōвыл щёс ялыс.**

Мāньлат хумиюв касуңкв щёпитахтын кастылиңойттүрэтпост тув минас. Руслан ёт касум хум таксар ос ёр боксёрыг ловиньтахты. Ты элы-пāлт тав налыман нупыл ат щёс рингыт алхатас. Налыман нупыл нила щёс нōхпатыглас. Тав ётэ алхатам мāхманэ вāt нупыл нила щёс ёл-сāңалāлым рātсанэ. Такви акв щёс туп рāтыглавес.

Русланын манрыг тāрвитың ōлыс? Ты касыл Альварадо олнэ ўст вāрыглавес. Таимāгсыл Русланын мощ тāрвитыңнув ōлыс. Тот ōлнэ мир савыңпāлэ тāнти боксёраныл сака янытлыяныл.

Хунь мāн сātхуйпловит щислат тув ёхтысўв, Руслан ёт рұпитан хум Вадим Корнилов мāн ётув пащалахтуңкв тāра ёхтыс. Тāн мāнав гостиницан ōлуңкв тотсаныл. Руслан ос Альварадо халэнт потыртан прессконференциян мāн Вадимын вōввесўв.

Вадим тōнт лāвыс: «Руслан такви мāхманэ тыг ёхтысыт, таимāгсыл тав номтэ ёмасыг ёмтыс».

Хунь мāн прессконференциян ёхтысўв, Руслан лāвыс: «Ам мāхманум тыхōтал ёхтысыт, ань тāн пуссын тыт ōлэгыт. Тāн халанылт тыт ам омам ōлыс».

Фотоаппаратыл пōслын мāхумтāра Раиса Алексеевна пōслуңкв патсаныл. Тув ёхтумувт, сōль, Альварадо янытлан мāхум сав. Прессконференция ойгпан элы-пāлт Руслан Альварадон футболкал мўйлуптавес, тот Альварадо наме хансым ōлыс.

Мōтыт хōталт каснэ хумыг вёскалавесыг. Альварадо Русланныл 420 грамм тāрвитыңнув ōлыс. Таимāгсыл тав мощ кұпняман мāгсыл тит щёсыл майлуwes. Альварадо тāрвитэ ёрнэ мус ат те āлымастэ вāруңкв, халэнт касуңкве ат тāртнувег.

Каснэ хōталт мāн



ПУСТАҒЫЛ ӨЛЭН



Майк Альварадо ос Руслан Проводников

Руслан ёт хōтыл порат мощшаквѐн акван-хōнтхатыгласўв. Тав мāхманэ ёт тувыл тāра касылын щѐпитахтуңкв минас. Этипāлаг мāн мāньщи маснутанув массанўв, койпанув ёт висанўв ос тув минасўв.

Тув ёхтумувт, полициян койпанув тўлуңкв ат тāртвесўв. Ты коныпал мāнавн Руслан ёт ринг мус минуңкв эрыс. Тув мāн ос ат тāртвесўв. Щалтнэ āвиныл тāра касыл сунсуңкв тѐтвесўв. Каснэ мус Русланув иң

щѐс арыгтем тактѐт олыс. Аквматѐртын Руслан Проводников наме лāввес, рингын та нѐглыс. Хумыг каснэ вāрмалѐн та овылтахтас.

Руслан тав ётэ каснэ хумитэ овыл раундыл рāтуңкв овылтастэ. Альварадо хотмус такви щирѐт аквписыг ювле лаквим ринг янытыл сōвыррищ хольт хайтыгтас. Руслан таве нѐлоловит раундыт тит щѐс ѓл-паттыгластэ. Рефери хум Тони Викс тāра ловиньтаңкв патыс.

Руслан тўяг Тимоти Бредли ёт касме порат, рефериг оlnэ хум овлѐт ўрхатас, хунь Тимоти пуңке мощ эмаснувег ёмты, ту-

тым «Руслан-чемпион» рōнхуңкв та патсўв. Рариса Алексеевна ос Татьяна Степановна ринг тиврын Руслан палт воввесыг.



выл ущ ловиньтаңкв овылтахтас.

Ань ловит раундыт Руслан Альварадо хўрмиттыг тāкыщнув вильтѐт юныгтастэ. Альварадо ринг янытыл тыгле-тувлетотыглаңкв патвес, ворил ты вѐритас. Ринг сāмын такви минуңкв ат вѐрмыс, ань пуңке сака торнувес, таимāгыс ринг мōт сāме нупыл ёмыс. Тони Викс Альварадо элалы каснэ урыл титыгтастэ. Майк Альварадо элалы алхатуңкв воссыг ат кāсащас.

Мāн тōнт пуссын нōхквāлапасўв, акван-сыныгтахтым, аниглах-

Тот оlnэ мāхум йильпи чемпион хум янытласыт. Пуссын лāвѐгыт: «Чемпион энтап Руслан Проводниковын хосат миңкв эрыс».

Касыл юи-пāлт Руслан янытлаңкве мāн таве кон ўрыслўв. Хунь тав мāхманэ ёт конквāлыс, мāн ѓркāтыңхумиов элы-пāлт мāньщи хум ййкв ййквсўв.

Тох ты мāн, нѐлолов хōтпа, Руслан Проводников, йильпи чемпионув, янытлан мāгсыл яныг щāрщ ўлтта Американ ялсўв.

Александр
ВЬЮТКИН

ПУСТАГЫЛ ӨЛЭН

Лүимә касылыт элаль тотавет

Округувт савсыр мирыт аквѣт юртыңыш ӧлнэ кастыл, мәнъ таквс этпос 21-25 щис-лат Сургутский район Солнечный ос Белый Яр павлыгт нйврамыт магсыл каснэ вѣрмалъ вѣрыглавес. Руц щирыл ты тѣла «Зимние первенства по северному многоборью» лѣваве.

Ты вѣрмалъ Ханты-Мансийский округт «Этнос» нампя сосаң мирыт каснэ колт рүпитан махум тән щѣпиталсаныл. Күщаиг тот Олег Андреевич Хатанев, мәнъщи хум, рүпиты.

Сургутский район янытыл касыл күщаиг Григорий Николаевич Рабий ӧлы. Тав Молдавия мѣт самын патыс. Школат хаништахтамэ порат пыгрищит ѳт пѣрщүңкве ялантас. Ты вѣрмалъ щирыл «мастер спорта» намыл майвес. Сургут үсн 1978 тѣлт комсомольский путевка щирыл ѳхтыс. 1983 тѣлт ты каснэ тѣлан минас. Анъ вѣт тѣл нйврамыт ты каснэ вѣрмалън ханищтыянэ. Тав ты урыл ӧнумн мощ потыртас:

- Тамле касыл мән вѣтихал вѣрыглѣв. Касың

тѣл савсыр павлытныл, үсытныл нйврамыт акван-атыглыянүв. Хотьютаныл кѣркамувег ӧлѣгыт, тыт тән ѳраныл ӳрталѣгыт. Ты сака ѳрнэ касыл, тѣл сыс кит щѣ щѣпитѣлылүв. Таквсы порат нйврамыт Солнечный павылт касѣгыт. Түяг ос Нижневартовский район Излучинск павылн то-тыглыянүв. Тот ӧс акв тамле каснэ кол тѣстым ӧлы.

Ты вѣрмалън маныр ѳри, пуссын ѳмщакв щѣпитѣв. Нйврам хотум ул вос ѳмтыс, каснэ коланувт лѣккарыт рүпитѣгыт. Посың, ло-щит колнакыт тән ѳт хүлѣгыт, ѳмщакв үщ-лахтѣгыт. Хӧтыл сыс хүрум щѣс тѣнutyл тыттыянүв. Нйврамытн тыт касуңкве сака мұс-ты. Тән тыг яныг щѣг-



тыл ѳхталѣгыт.

Овыл щѣс ѳхталам нйврамыт анъ кѣркамувег ос тѣксарыг ѳмтсыт. Каснэ колт нйврамыт мұсхал щирыл пирмайтыянүв ке, тән номтаныл ѳма-сыт, касыл порат нӧх-патнѣныл магыс тән сѣв ѳр пинѣгыт. Анъ таквсы касылн 12-13, 14-15, 16-17 тѣл яныт нйврамыт ѳхталасыт. Тувыл ос акв тамле пұмащ ӧлы, таквсы касылн ѳхталан ӳгит тән пыгыт ѳт акв-тѣм касѣгыт. Таимѣгыс таквсы порат щар ѳр, тѣксар нйврамыт тыг тотыглавет. Мән касың

тѣл ат вѣрмалъ щирыл касыл вѣрыглѣв.

Овыл вѣрмалъ: кит лѣглыл хүрум щѣс элаль порыгмѣгыт – ты сака тѣрвитың касыл. Касың нйврам тох по-рыгмаңкве ат вѣрми. Анъ Магадан үсныл ӧлнэ хотпа 11 метра 81 сантиметра рекорд вѣрыс. Эрың иң хоса нѣмхотыют тыгыл сѣв-нүв порыгмаңкве ат вѣрми тах.

Китыт вѣрмалъ: ййовыл ѳт хѣйтѣгыт, таве мӧтанын-мӧта-нын таве майлыяныл. Мәнънүв нйврамыт акв вѣрыста хѣйтѣгыт. Яныг нйврамыт халт ӳгит кит вѣрыста, пыгыт хүрум вѣрыста хѣйтѣгыт.

Хүрмит вѣрмалъ: сѣграп пѣхвтаве. Йис потыр щирыл, пѣс ма-хум мак тамле сѣгра-пыл вӧраяңкве яланта-сыт. Кѣркам хотпат ты-ламлан манос вит тар-мыл уйигтан товлың үйит алыщласыт. Тӧва-накт тамле сѣграп вуц-касым янгуи манос сѣлы алыгласыт. Уй тѣкыщ ке хӧяве, ѳл минуңкве ат вѣрми. Вӧраян хотпа таве лѣңхе хосыт юил коитѣ, тыщир нѣвыль кѣтын ты паттыгласыт.

Нилыт вѣрмалъ: тыныщаң пѣхвтаве. Ты





ос сака пұмаш қасыл, нйврамытн сака әруптаве. Атхуйпловкем метран элнұв сув тұштaве, тыньшаңыл та ййв рёпыгтаңкве әри. Ты қасылт сәлың қолт яныгман нйврамыт тән шар мәштырыг пәхвтәгыт. Ты ати, руш, хатань, молдован, украинец нйврамыт халт сәв мәштыр хөтпа ос олы. Тән ань ос тыньшаң ёмшакв пәхвтуңкве хаништахтасыт. Ань олум қасылыт тыньшаң пәхвтынәныл порат сосаң нйвраманув овыл хұрум местан ат ликмысыт. Мәнънув нйврамыт халт тай ос Русскинские павылт олнә ханты пыгришит нөх-патсыт.

Атыт вәрмаль: сун

ұлтта поргын қасыл. Тот шар ёр хөтпат овыл местат вуйләгыт. Ты щирыл ловиньтаве, команда хоты места выг. Кәсың хөтпа вәгтә, тав манасәвит балл оныщи. Хөтпа поргын порат сун ләглыл хөилтытә манос акв ләглә нөх-алмайтә ке, қасыл тәра ёл-пөилттaве. Таимәгыс ты қасылт сака ұргалахтым поргуңкве әри. Хоты команда сәвнув щёс сун ұлтта порыгми, тән нөх та патәгыт.

Ты қаснә вәрмаль хөтал палыт мины. Хөтпа поргынәтә порат сәв ёр, номт пины. Туп хәснә щирыл поргын хөтпатнөх-патәгыт. Ань ты накт мәнъ нйврамыт халт акв пыг китсәт хус



щёс сун ұлтта порыгмас. Яныгнув нйврамыт халт пыг - атсәт хус щёс, әги - ниласәт акв щёс сун ұлтта порыгмасыг. Нйврамыт ләвнәныл щирыл, қолқан ат әртми, поргуңкве тәрвитың, сәвнув щёс порыгмаңкве кос рөвыс.

Тыгыл элалы ты қаснә вәрмальт хотыютаныл нөх-патсыт, 16-17 тәляныт нйврамыт халт шар тәқсар ат пыг, нила әги вивет, янас команда щёпитaве. Тән элалы Краснодарский крайн Россия қасылн мән округув мәгыс қасуңкве минәгыт тах. Нйврамыт тув ликмуңкве сака таңхёгыт. Таимәгыс вәгтал патнәныл мус та қасәгыт. Тот ос аквтох ат вәрмаль щирыл қасыл ёмты тах.

Григорий Николаевич мәштыр нам оныщи. Тав Россия янытыл рекорсменыг олы. Ты қасылн хаништахтуңкве Солнечный павылт овылтахтас. Кәсың хотал Сур-

гут ұсныл такви қасуңкве тув ялантас. Ань тав тот кұшаиг рұпиты. Ты вәрмаль тәл сыс акв щёс Сургутский районт школат халт вәрыглаве. Ань Сургутский район янытыл ниласәт арыг нйврам ты қасылн ялантәгыт. Ты сака ёмас тәла, нйврамыт лұймә мирыт қасылыт элалы тотыяныл.

Тувыл ос қасыл оигпаме юи-пәлт Олег Андреевич тув ёхталам нйврамыт пуссын янытласанә. Нөх-патум әгитпыгыт пуссын мәгылн тагатан пөсыл мисанә. Ос мак яныг кубок Нефтеюганский районныл ёхталам нйврамыт висаныл, тән тәқсарнувег қассыт, овыл места висыт. Котиль кубок ос Сургутский район вис, тән китыт мөстан ёмтсыт. Мәнъ кубок ос Ханты-Мансийск ұсныл ёхталам нйврамыт юв тотсаныл, тән хұрмит местан патсыт.

Николай МЕРОВ



Щагтым акван-хонтхатыгласыт

**Саранпавыл школа
рүпитанэтэ пәсыл 111
тәлэ төвлыс. Тысәвит тәлыт
мәләл пәс документ хосыт
тәра-паттувәсыт. Тувыл школат
рүпитан хөтпат конференция
вәруңке номылматсыт. Таве
мәнь таквс этпос өвыл сәтыт
вәрыгласаныл.**

Наталья Михайловна Шиятая, Ханты-Мансийск үстискусствоцентрыт рүпитан нә, тув мүйлуңке вөвыглавес. Ам таве мүйлын тәлат урыл моц китыгласулум, нән потрумән элал ловиньтәлбн.

– Саранпавылн ялмум мәгыс ань тыг мус хот-щагтым өлэгум. Тот ам школат сәтхуйплов тәл нәврамыт английский ләтңыл потыртаңке ханищтасанум. Ань хөтхуйплов тәл Ханты-Мансийск үст өлэгум, сәвсыр искусстван ханищтахтын нәврамытәт элал рүпитәгум. Ос ам та пәсыл Саранпавылн ат ялсум.

Мән ань тув хунь иссүв ос товлыңхәпныл түйт тармыл вәгысүв, кон ащирмаң олыс. Төнт Ханты-Мансийскат иң мәлтып олыс, ос раквыс. Пәвил шар мөтхурипаг өмтум, сәв колыт үнттувәсыт. Йильпи яныг школа ам кәсаласулум ос тув щәлтмум порат әнумн тот сака мұстыс. Коланыл посың, сыстам, пормасыт, нәпакыт пуссын тәнки әрнә мәт өлэгыт, иснахәпытт хорамың лүптат янмалтавет. Нәврамыт ханищтахтын пасананыл, уласаныл өс сыстамыт. Та щырыл школат рүпитан кұщайт тән вәрум вәрмәляныл осн-патәгыт. Ам амки хосат тәгыл школат

рүпитәгум, ос вәглум, хумус нәврамыт хөтәти мори пәсләгыт, хансәгыт.

Тувыл ты ялпың хөталаныл мәгыс пуссын өмщакв щөпитахтамыт. Саранпавыл школа аслам хөтпат тәланыл щырыл янас нәпак-лөпсын хансым өлсыт. Тот пуссын ханищтахтам ос сәв тәл рүпитан мәхум хуритыт суссанум.

Ялпың хөтал вәрнә яныг колнакт сәв мәхум атхатсыт. Ам тот аквәтрүпитам мәхманум өт хөнтхатсум, пуссын хот-щагтсүв. Тән нама-ныл газетат ләвуңке



Рокина, Н.Н. Сироткина, Е.Н. Артеева, Л.Я. Мотоусова. Валентина Александровна Кустышева өт өтыл акван-хөнтхатыгласмән, тав ләглә сакватам. Мөт ханищтан хөтпанув Саранпавылн өхтуңке ат вәрмысыт. Сака сәль, тән уранылт өс потыртасүв, ос паща ләтың тәнанылн кетәв. Тыи А.Б. Скрипничен-

хасмыт ос тув кетмыт. Мөт хөтпат кетум ләтңаныл ос тот ловиньтавәсыт.

Акван-хөнт-хатыглам порав сака өмасыг минас, Дмитрий Георгиевич Агеев ханищтан нәвраманә сака нөтнәг әргысыт, ййквсыт. Раиса Михайловна Капшук, Саранпавыл школа кұщай вәңын эква, мәнавн пәс документ-нәпак суссылтастә ос сәв тәл сыс школат рүпитам кұщайт нама-ныл ләвсанә.

Андрей Дмитриевич Попов, школа кұщай хум, сәв тәл рүпитан хөтпат пуссын эсгысанә, мүйлупсал мисанә. Вера Павловна Комкова тән уранылт потыртас. Тувыл хосат школа әстлам мәхум тәнки ханищтахтум тәланыл кастысаныл. Тән потыртамааныл ищхыпың ут хосыт сыресыр хурит так-талавәсыт.

Пуссын «последний звонок» ялпың хөталаныл, «зарница» өнгиланыл сымыңыщ номияныл. Тувыл ам рүпитамум порат ханищтам нәвраманум өт хөнтлам хөтпат палт колсори рүпата вәруңке ялсүв. Школат ханищтахтам ос рүпитам тәланув сака пүмщиң өлсыт.

Наталья Михайловна яныг пүмәшипа ләтың ләвөгум. Мән, газетатрүпитанхөт-пат, өс Саранпавыл школа әстлысүв, таве ялпың хөталыл янытлылүв.



таңхиянум, тыи М.А. Истомина, Н.К. Филиппова, Э. И. Артеева, Е.С. Квашнина, Н.Г. Рочева, Э.Н. Илюшникова, А.Е.

ко, Н.Ф. Денисова, Н.М. Кугаевская, А.Ф. Козельская, Л. М. Копыльцова ос мөтаныт. Тән тәнки өс яныг паща ләтың

**Тамара
МЕРОВА**

ХАНИЩАПА



Белоярский район
Полноват павылт акв
кәркам, сэръяр маныщи
нэ ылы, Надежда Ива-
новна Слинкина, аги

бопарищ наме Хозумова.
Школат тав ват нупыл
нелолов тал рупиты, руц
латың ос литература
урок няврамытн ханищ-

Школат рупитан нэ

ты. Тав Саранпавылныл
ылы, тот самын патыс,
яныгмас. Школа аста-
ламе юи-палт Тобольск
усн минас, тот Д.И.
Менделеев нампа ин-
ститутт ханищтахтас.
Институт аста-ламе юи-
палт Полноват павылн
рупитаңкве кетвес.

Тотхум вэрыс, ойкатэ
Александр Вячеславо-
вич. Кит няврам оныщэг,
агитэн Ольга, пыгён Ев-
гений. Няврамагён шко-
лат ёмашакв ханищ-
тахтасыг, школа аста-

мён порат сөрни мета-
лил майвесыг.

Мань таквс этпос
хотхуйплов хоталэт На-
дежда Ивановна атпан
талэ товлыс. Намхоталэ
кастыл тавён ман сав
ёмас, сымың латың
лавёв. Пускэт, пуслагыл,
сотыңыщ, щуниңыщ
вос ылы!

*Хурит Надежда
Ивановна эцгае
няврамыг
ёт пöслым ылы.*

Рүт махманэ

Нэпак ловиньтан колнак

Хальүс район Кульпас
павыл школат нэпак ло-
виньтан колнак ылы. Күщаиг
тот Елена Анатольевна Вовк
рупиты. Школан щалтсамум по-
рат ам ты нэ ёт потрамасум,
рупататэ урыл китыглахтасум,
нан ань тав потре ловиньтэлйн:

- Йильпи нэпакытыл
м а н м ö р с ы ң ы щ
тотыглавёв. Няврамыт
ловиньтанэныл магыс
торың нэпак атим, кол-
накувт яныгыщ ань пёс
нэпакыт олэгыт. Касың
тал ман павыл яныт
мири лавыглэв, ань хо-
тют юн арыг нэпак
оныщи те, манос хот-
ты нэпаке саль ати те,
ман палтув вос тоты-
тэ. Сакати ты нэпакыт
няврамыт ловиньтэгыт.
Ань май интернет нам-
па ищхипың ут ылы, та
ут тара ман сав махум
ёт потрамёв, халанувт
пищма хансёв. Акв хум
ёт потыртахтасёв, тав
манавн нэпак кетуңкве
лавыс.

Соссаң махум лите-
ратура ос сака мощца,
нэпакыт пуссын пёсыт.
Ань йис няврамыт ло-
виньтан нупыл тэланыл
сака пыл ати, юн савсыр
компьютерт ман интер-

нет оныщэгыт, номта-
ныл тувле нупыл мины.

Тыт ханищтахтан
няврамытёт ман савсыр
конкурсыт ос выстав-
кат вэрыглэв. Түяг ман
С.Я. Маршак хансыг-
лам «Кошкин дом» по-
тре щирыл спектакль
суссылтасёв. Няврамыт
ёт ам аква рупитёрум
- катыл савсыр хурит
пöслэв, библиотечный
урокут вэрыглэв. Ты ко-
ныпал интернет хосыт
ман савсыр олимпиа-
датт ос Россияв янытыл
вэрыглан конкурсыт
участие пирмайтэв. Тан
туп ловиньтаңкве вос
тахнувыт, нэпак хас-
нэ махум наманыл вос
ванувыт.

Кит агиришиг, Ксю-
ша Черникова ос Ло-
лита Солкуцан, ануи
акваг нётэг, библио-
течный советн ёхталэг.
Пёс нэпакыт хот-
маныгтахтам мананыл



эльмыл акван-ханлыя-
нув, лолтал пиныянув.

Елена Анатольевна
ойкатэнаме Андрей Ми-
хайлович. Кит няврам
оныщэг - агитэн нёло-
ловхуйплов талэ, пыгён
хүрумхуйплов талэ.
Маньнув эще ос Куль-
паст ылы, хүрум няврам
оныщи. Яныгнув эще са-
мын патум мананылн
ювле минас, тот ойка
вэрыс, ос хүрум няврам
янмалты.

Ты хүрум ягэгит иң
маниг олманыл порат
оманыл ёт Кульпасн
вантлысыт, аги бопарищ
наманов Скитёва. Тан
Свердловский область
Асбест үст самын пат-
сыт, тот олсыт. Оманыл

хотталь щалтме атталыг
ты ёмтыс. Сака ёмас,
хотпанупылсымың ёква
ылыс, Кульпас павыл
лапкат сав тал рупитас.

Елена Анатольевна
тамле ёмас, каркам нэ.
Школаттав няврамытын
эруптаве, тав ётэ ма-
тыр вэруңкве тананылн
пұмыщ. Ты ятил нётёв
күщаянэн вос нётэве,
сав ёмас нэпакыл вос
тотэве. Щёмьятэ ёт
пустэгыл вос ылы, пус-
кэт, пуслагыл!

*Хурит Ксюша Черни-
кова, Елена Анатольев-
на ос Лолита Солкуцан
пöслым олэгыт.*

**Светлана
РОМБАНДЕЕВА**

Канащиг ӧлум Молтан ӧйка рӯтанэ

«Торум Маа» музейт рӯпитан хӧтпат «История семьи в истории страны - след прожитой жизни» намба проектаныл щирыл ӧлаль рӯпитӧгыт. Тӧн ань Молданов яныг рӯт урыл йильпи суссылтап щӧпитасыт ос таве «Хранители Казымской богини» намтсаныл.

Ань Ханты-Мансийскат Молдановыт музейн акван-атыглавӧсыт, тот тӧн тӧнки пӧс рӯтаныл ӧвылтыт ос тӧнки урыл потыртасыт. Касум мӧт XIV нотыт Молтан намба канащ хум ӧлум. Ты урыл Ольга Кравченко (Молданова) пӧс нӧпакыт потыр хӧнтум. Тот 1483-1485 тӧлытыт канащаныл ӧт ӧлыглам вӧрмалит хансым ӧлсыт. Тувыл «Югра» телерадиокомпания та йис вӧрмалит ӧс тӧра-паттысаныл ос тӧнаныл «Фамилии Югры» программа мӧгыс кинан пӧслысаныл. Та кина ань мӧй мӧхумн суссылтавес.

Мӧт пӧс нӧпакт тамле лӧххал хӧнтсыт: «1782 тӧлт Юильск пӧвылт Молданов ӧпарищ намын 11 хум ос 11 нӧ хӧтпат ӧлсыт». Сатпан арыгкем тӧл ювле-хультум порат тамле ӧпарищ намыл 74 ӧлумхӧлас ловиньтавес.

1990 тӧл пӧсныл Татьяна Александровна



Молданова рӯт мӧхманэ пуссын акван-хансуңке патсанэ. Ань тав яныг рӯтэ пуссын нӧпак-лӧпсын хансытэ. Тот сӧт аквӧрт Молдановыт акван-атым ӧлӧгыт. Ниласӧт арыгкем хӧтпа на-маныл тув хансымат. Тӧн Югра ос Ямал мӧн лӧкква-ӧлмыгтамыт ос тӧват мӧт ӧпарищ нам ӧнӧщӧгыт, тыи Вагатовыт, Вӧнку, Лозямовыт, Кетовыт, Рандымовыт, Сенгеповыт, Тарли-

ныт, Тасьмановыт, Тоголмазовыт, Шугановыт. Тӧваныл иҗ тӧра ат паттыяныл, ты рӯпатэ Татьяна Александровна тах ӧлаль тотытэ.

Ты яныг рӯт мӧхумныл тӧват хӧл алыщлӧгыт,

вич история наука сас кандидат нам ӧнӧщӧг. Тӧн ханты пӧс йис накыт ханищтӧг ос нӧпакыт хансӧг. Ольга Кравченко ӧще, Александр Михайлович Молданов, урыл потыртас. Тав «Казымский» намба совхозт бухгалтерыг рӯпитас. Суссылтапыт пӧс хурит сунсыгласанӧв, ты тӧва хурит ӧщӧн пӧслымат.

Хурит коныпал выставкат мӧт сӧвсыр пормасыт суссылтавӧсыт. Тыи пуссын тӧн рӯт мӧхуманыл вӧрим пормасыт. Нӧ хӧтпат мӧщтырыг маснут йӧнтӧгыт, сак хартӧгыт, хум хӧтпат йивныл матыр ӧргӧгыт. Мария Кузьминична Волдина ос Ульяна Николаевна Шульгина ты рӯтныл ӧлӧг, мӧлал тӧн ты музейн тӧнки йӧнтум хорамын супанӧн, лӧпта мӧйлуптасыг. Ульяна Николаевна ань Молданов рӯтанэ мӧгыс такви ӧргӧге ӧргысаге.

Любовь Федоркив, Ирина ос Надежда Молдановыг ӧс тӧнки щӧнь-ӧщаныл урыл потыртасыт. Любовь «Лылынг союм» намба колт ос Ирина технологического педагогического колледжит нӧврамыт ханищтӧг, Надежда соссаҗ мӧхум культура колт рӯпиты.

Молдановыт тӧнки халанылт ӧруптахтым ӧлӧгыт, нӧмхотьютаныл ӧвылтыт ат ӧрувлӧгыт. Ань акван-нӧтхатым рӯтаныл нӧпакын ӧлаль хансуңке тах патыяныл.

Ты хурит Ханты-Мансийскат ӧлнэ Молдановыт пӧслысанум.



Тан махумн нётэгыт

Округ янытыл Ханты-Мансийск үсн сав махум ёхта-ласыт. Тан пуссын общественный объединеният рүпитэгыт, тан магысланыл ты сапрани вэрыглавес. Ос аквта порат «Социальная ярмарка некоммерческих организаций ХМАО-Югры» ылыс.

Касын общественный организация тот янас суссылтап вэрыглас. Тан мирн суссылтасыт, манхурип рүпата вэрэгыт. Ты организацият рүпатаныл хосыт яныг тэла вэрэгыт - тан махумн нётэгыт. Ань тан танки халанылт вос вайхатэгыт, акванюрщхатым ос мирн нётым элаль ёмашакв вос рүпитэгыт. Суссылтапын ёхталам махум, ветераныт, агмын-мо-сын хотпат, яныгпала хотпат, сав мот организацият рүпатаныл

урыл пүмшалахтасыт.

Соссаң махум организацият тув ос вовиньтэлвэсыт. Асугорский маңылат хотпат организация, «Югра лылыеп» Белоярский отделениятэ суссылтапыг тот ос вэрыгласыт.

Ярмарка ос форум олум порат махум савсыр вэрмалы урыл потыртасыт. Округунт олнэ савсыр мирыт танки халанылт хумус олэгыт, «Многонациональная Югра» намба секцият махум тот ты урыл потыртасыт.




Сапрани оигпам юипалт тан нэпакн хасыт, ань савсыр мирыт халанылт юртыңыщ вос олэгыт, Общественный палата, культура департамент, рай-

онный миркол кұшаит савсыр фестивалит, ялпын хоталыт ос сав мотэрнэ рүпата вэтихал вос вэрэгыт.

**Людмила
ТЕТКИНА**

Лүимә мир сунсуңкве ёхталэн



Ханты-Мансийскат Ма-вит ос Элумхолас намба музейт савсыр суссылтапыт щёпитым олэгыт. Товат аквписыг тот рүпитэгыт, пёс йис порат олум үйхулыт, соссаң махум пёс олупсаныл ос нёр ахвтасыт суссылтавет. Мот выставкат йильпииг вэравет, тан кит-хүрум этпос юипалт мот үсн элаль тотавет.

Ань ты музейт «Путешествие по Северу» намба суссылтап вэрвес. Тув щалтнэ махум тот савсыр пёслым хурит касалэгыт. Хурит 1970-1986 талыт порат пёслуэсыт. Савыңпалэ сэмыл хаснэйивыл пёслым хурит олсыт кос, ос лүимә махум олупсаныл та талыт порат

хумле ылыс, пуссын тан тэланыл мащтырыг ос сака нётнэг та хурит сусхатэгыт.

Хурит пёслум хотпат С.В. Смирнов, К.Б. Назаров, Э.С. Сивцев, В.Н. Петров-Камчатский, М.А. Рахлеева соссаң махум палт Архангельский областин, Бурятия, Чукоткан, Якутия, Красноярский ёрн ос Ненецкий автономный округын ялыт ос тот рүпитасыт. Хосат тан пёслум хурияныл «РОСИЗО» намба Москват олнэ центрын ёвтвэсыт ос тувыл савсыр музейтытн лакква-уртвэсыт. 2010 талт това хурит Ханты-Мансийскан тотвэсыт ос Ма-вит ос Элумхолас музейн мүйлуптавэсыт.

Тамара МЕРОВА

Хурит пöслуңкв ханищтавёсыт

Округувт мǎньщи ос ханты мǎньлат мǎхманув организацияныл рўпیتی, рущ лǎтңыл тох лǎваве – молодёжная организация обско-угорских народов ХМАО-Югры. Кўцаиг тот кǎркам ханты ǎги Надежда Молданова ǎлы.



Тǎн сǎвсыр мǎтт рўпитǎгыт, художник-нам нǎмхотǎют ат ǎньщи. Тǎнтилǎщалматыр пǎслǎгыт, тǎванакт хурияныл ловиньтан нǎпакытн вǎравет.

Тǎн а н ы л х у р и пǎслуңкв ханищтан мǎгыс ǎнь акв ёрн хум вǎвыглавес, тав наме – Леонид Лар. Тав мирн вǎнǎ художник-хотпаг ǎлы. Пǎслум хуриянǎ сǎвсыр выставкат сусылтавет, мǎт хǎн мǎн тотыглавет.

Ювле хультум ǎтпост тǎн кǎтыл хури пǎслын мǎхум Ханты-Мансийск ўст акванатыгласаныл, ханищтап тǎн мǎгсыланыл вǎрыгласыт, «Человек рисующий» тох намаясаныл. Хǎльўс, Белоярский, Сургутский районныл хурит пǎслуңкв хǎснǎ мǎхум тув ǎхталасыт.

Леонид Ямал мǎт самын патыс, тот яныгмас. Щǎняге-ǎщаге сас ёрныг ǎлсыг. Мǎниг ǎлме порат тав такви ляпа рўтанǎ ёт ялпың мǎн ялантас, мǎхманǎ хумус пўрлахтасыт, нǎйт хотпат хумус кайсыт, пуссын сунсыс. Тав школат ханищтахтамёт щǎнь-ǎщ тǎл хультыс. Пǎслуңкв ул ёмашакв

хǎсыс, таимǎгыс Москва ўсн училищан ханищтахтуңкв тǎтвес. Рўпитаңкв юв ǎхтыс, Салехард ўст нǎврамыт ханищтасанǎ.

Тувыл Тобольск ўсн минас. Тот ханищтахтуңкв ǎстламе юи-пǎлт, тув ǎлмыгтас. Тобольский педагогический академият хусахтем тǎл преподавателиг рўпیتی, лекцият ловиньты. Та сус наука рўпата вǎруңкв патыс, кандидат нам ǎньщи. Тав «шаманизм» тǎлал пўмщалахты. Ты урыл сǎв научный нǎпак хансыс. Рўпитанǎтǎ сус хурит акваг пǎслы. Хуриянǎт такви ёрн мǎхманǎ, тǎн ǎлупсаныл, сǎвсыр ялпың вǎрмалит пǎслы.

Тобольск ўст рўпитаңкв ǎвылтахтаме порат тав юв командировкан тǎтвес. Наука рўпататǎ вǎрнǎ мǎгыс, тавён нǎйт хотпа хǎнтуңкв ǎрыс. Нǎйт хотпа тот хǎнтыс, та хотпа тавён лǎвыс, ты вǎсар вǎнǎ мǎгыс мощ ханищтахтуңкв ǎри. Ямал ляпат Луи щарыщ

нупыл тумп ǎлы, лǎваве – Белый остров. Та тумп ёрн мǎхум мǎгсыл сака ялпыңыг ǎлы. Тув ты Леонид нǎйт хотпан тǎтвес, тǎнутыл ёт щар ат майвес. Лǎввес, тит сǎт тот вос ǎлы, тǎнут такви вос тинсы.

ǎнь атхатыглам мир нупыл хум ты урыл тох лǎвыс:

«Тит сǎт тот ǎлмум сусам кǎтыл хўл пувсум. Сǎль, хотпа тǎтǎл ǎлнǎтǎ порат номсахтуңкв мǎт щирыл паты, ǎлупсатǎ ǎс щар мǎт щирыл мины. Амти Нǎяну́м, амти Отыранум нупыл акваг пǎйкщасум. Аквтуп тот матарын ǎхталавёсум. Хоталанум ювле хультсыт, ам ювле нǎйт ǎйка палт та ǎхтысум. Тǎнт ам койп кǎтын виңкв тǎртвёсум. Тав ǎну́мн такви койпе ат мистǎ, лǎвыс – амти мǎгсылум койп амти вос вǎрǎгум. Тох ты койп рǎтуңкв тǎртвёсум».

Хус арыгтем тǎл сус ты хум ёрныт ǎлнǎ сǎвсыр мǎн ялантас – Архангельский ǎбластьн, Красноярский крайн. Тот ǎс нǎйт мǎхум ёт хǎнтхатыглас. Тǎват тав ётǎ вǎшинтахтуңкв ос потыртаңкв ат кǎсащасыт. Леонид тох лǎвыс: «Ат рǎвнǎ мǎн ам нǎмхуньт ат ялсум. Яныг мǎхум лǎтңын хўнтлысум ос ǎнь тыг мус хўнтлǎгум».

Сǎвсыр мǎт яласым, тав ялпың мǎт хурин пǎслыанǎ. ǎнь та хурит мирн суссылтасанǎ. ǎнь ты ǎлум ханищтапт тав мǎхум кǎтыл хурит пǎслуңкв ханищтасанǎ. Тувыл ты хурит акванатавет ос нǎпакыг тах вǎравет.



Игорь Потпот ос Надежда Маслова

**Валентина
ВАСИЛЬЕВА**

Йис потрыт, эргыт руц латңыл хасвёсыт

Юван Шесталов хуньт օвылтам рӯпататэ рӯтанән ос руманән элаль вәраве. Ань тән «Именитые богатыри обского края» намба китыт нэпак таратасыт.

Аквта щирыл на-маим օвыл нэпак 2010 талттаратавес. Танэпак таратан магыс лүимә махум департамент-ныл олныл тастыг-лавёсыт. Тонт потрыт Юван Николаевич так-ви щёпитасанэ. Ос маньши Най-Отыра-нув урыл пёс йис потрыт, мөйтыт руц латңын толмашлаңкве кит маньши нэ хотпаг нётсыг, тьи Светлана Динисламова ос Альби-на Мехнина. Руц потрыт ёт элаль Ирина Рябий, Вадим Орлов (Югорский универси-тетт рӯпитан хотпаг) ос Герман Ионин (Санкт-Петербург үсныл) рӯпитасыт.

Тананылн Юдит Дмитриева нётыс. Тав ЮГУт венгерский лә-тың хаништан нэг рӯпитас. Хунь маньши потрыт руц латңын тарвитың тол-машлаңкве օлыс, Юдит тав օвлёт венгер-ский латңыл хансым потрыт ловиньтасанэ, ос та юи-палт руц латңыл потыртасыт. Тох маньшит, рушит ос венгр нэ халанылт хултыглахтым потрыт ёмшакв хассаныл.

Ань таимәгыс «Име-нитые богатыри обс-кого края» намба нэ-пакыг хұрум латңыл хансым օлэг. Ты пёс потрыт, мөйтыт Ан-тал Регули ос Бернат Мункачи, венгр учёный օйкагн, хуньт маньши махумныл атвёсыт.

Тувыл 1892-1921 талыт сыс тән вен-герский латңын тол-машлавёсыт ос нила

нэпакыг вәрвёсыт. Ётыл 1952 ос 1963 талыт Бела Кальман, венгр учёный хум, това потрыт немецкий латңыл хассанэ ос кит нэпак таратас. Та нэпакыт урыл савсыр учёныйт пүмшалахтэгыт. Руц латңын тән нэмхо-тютн ат толмашлал-вёсыт. Хосат венгрыт Бернат Мункачи хансум нэпакыт Юван Ше-сталовн мүйлуптасыт. Та пәсыл тав маньши пёс потрыт руц латңыл хассанэ.



Ань тав օвылтам рӯпататэ тахольт акв-та руманән, рӯтанән элаль тотаве. Тән ки-тыт нэпак ушты та-ратасыт. Тот редакто-рыг Вадим Орлов օлы. Ты тал Светлана Сели-вёрстовнан ос Альби-на Николаевнан мән маньши учёный хотпав Анастасия Ильинич-на Сайнахова нётыс. Тувыл потрыт Дина-ра Саидовна агитән пуссын ишхыпың утын печатайтавёсыт. Ты нэпакыгн потрыт, тув пәслым хансат Ири-



А.Н.Мехнина

на Семёнован ёмшакв щёпитавёсыт.

Китыт нэпаканыл магыс махманув округ

руц хотпатн ёмшакв щёпитавёсыт.

Тох руц махум օвыл нэпакт Ас-котиль օйка, Аяс-Торум тәрниң эрге, тав мөйтанэ ос Лар-үс օтырыт тәрниң эрыг ловиньтаңкве вөрмёгыт. Ань йильпи таратым нэпакт тән Мир-Сус-нэ-Хум, Эква-пыг-пыгриш тәлум мөйт, Мир-Суснэ-Хум-торум-пыг яныгманэ эрыг, түр-хотаң, Ас-хотаң-войкан-օтыр, Тагт-та-лих օйка тәрниң-эрге вос ловиньтэгыт. Маньши пёс мұтрат тара-паттыяныл.

Пуссын ты махмы-тын мән яныг пүма-щипа латың кётэв. Тән элаль օлнэ сав нот кастыл сака эрнэ рӯпа-та вәрсыт. XVII-XX но-тыт օлум венгр, финн учёныйт мұсхалыг вә-рум рӯпатаныл щир-ыл мә янытыл вәвет. Ань ты руц нэпак вә-рум хотпанув аквтох вос вәвёт, тән օс тар-вит рӯпата вәрсыт. Ам номсыкёмт, тән нама-ныл хуньт тах суиңыг ёмтэгыт.

пәлыл олныл нётвё-сыт. Ты рӯпатаныл тән соссаң махум культура ўргалан ос нөх-вөрмалтан проект хосыт вәрсаныл.

Маньши пёс йис потрыт кит щёс руц латңыл нэпакыгн хан-сым օлэгыт. օвлёт пот-рыт Светлана Динис-ламован руц латңыл хумус толмашлавёсыт, та щирыл хасвёсыт. Тән руц щирыл «под-строчный переводыг» ләвавет. Ос та юи-палт ты потрыт «литера-турный переводыг»

САВСЫР МИРЫТ КУЛЬТУРА

Халувт юртыңыщ вос ӧлӧв

Яныг таквс ӗтпос
4 хӧталӧ ялпың
хӧталыг ӧлы, руц
лӧтңыл тох лӧваве
– День народного
единства. Анӧ сӧвсыр
мирыт халанылт
юртыңыщ вос ӧлӧгыт,
та хӧталт тӧн акван-
атыглавет. Тӧнти мас-
нутаныл, йикваныл,
ӗрганыл мӧт мирн
суссылтыяныл.

Ты хӧтал кастыл Хан-
ты-Мансийск ӱст «Югра
многоликая» фестиваль
вӧрыглавет. Округв яны-
тыл сӧвсыр ӱсытт ӧлнӧ
национальный ӧбьедин-
еният мӧн ӱсувн пуссын
вӧвыглаветсӧ.

Сӧв мӧщтыр хӧтпат тот
ӧсӧлсыт. Соссаң мӧхумныл
ты тӧл тув акв мӧщтыр



Галина Молданова



Людмила Зубакина



хӧтпа вӧвыглавет, Шия-
нова Галина Токчевна. Тав
ӗрн ӧква, щӧмьяң тӧгыл
сӧв тӧл тыт ӱсувт ӧлы. Тав
сӧвсыр сувенирыт, маснут
ӱнты. Сӧлы совныл лӧгыл
маснут, пӱркат ӱнты. Ту-

выл тыналыӧнӧ, тох мӧщ
олн сӧлы.

Мӧт мӧщтыр хӧтпа -
Галина Молданова, тав
ос «Лылың союм» студия
пӧлыл тув вӧвыглавет. Та
центрын ялантан нӧв-



рамыт ос тот рӱпитан
мӧхум мӧныщи ос ханты
супыл ӱнтыӧнӧ, сакныл
турлӧпсыт ос пальсакыт
харты. Тав сака мӧщтырыг
ӱнсахтуңкв хӧсы, хорама-
нӧ татем мӧниг ӱнтыӧнӧ.

Мӧт мирныл тот хатанӧ,
азербайджан мӧхум, руц
ос украина мӧхум ӧлсыт.
ӱс кӱщаиг рӱпитан хум Ва-
силий Филипенко ос мӧт
кӱщаит тув ӧхтуманыл по-
рат тӧн мӧгсыланыл азер-

байджан нӧврамыт татем
ӧмашакв йиквсыт.

Ты фестивальн ӧхта-
лам кӧсың мир, кӧсың
мӧщтыр хӧтпа янытла-
вет. Тӧн пуссын диплом-
нӧпакыл майвӧсыт. Та юи-
пӧлт концерт ӧлыс, мирыт
тӧнти щӧн лӧтңыл ӗргыт
ӗргысыт, йиквсыт.

**Валентина
ХОЗУМОВА**

**Луима сӧрипос
(Северная заря)**
№21 (1063), 8.11.2013

Соучредители
Дума, Правительство
Ханты-Мансийского
автономного округа – Югры

Издатель
Департамент общественных
связей Ханты-Мансийского
автономного округа – Югры

Редакция

Главный редактор –
Решетникова Р.Г.
Телефон (3467)33-36-82

Заместитель главного
редактора – **Кондина Г.Р.**
Телефон (3467)33-22-72

Ответственный секретарь –
Узель В.В.
Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
kmns.admhmao.ru

Отпечатано:
ОАО «Издательский дом
«Новости Югры» г. Ханты-
Мансийск», ул. Мира, 46.

Подписано в печать:
по графику 6.11.2013 г.
в 15.00.; фактически
6.11.2013 г. в 15.00.
Индексы **04399, 54399**
Тираж **1750 экз.**
Заказ **1369**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.